

永樂大典

卷七千三百七十八  
之七千三百七十九



永樂大典卷之七千三百七十八

十八陽

喪

喪禮三十八

安恭皇后中興禮書發哀 乾道三年六月二十五日禮部太常寺言准尚書省劄子。今月二十五日皇后上僊。奉聖旨應于合行典禮。令禮部太常寺討論。申尚書省。今討論下項。一檢照孝明皇后典故。皇帝初發哀。服白羅衫黑銀帶。乞令文思院製造。赴御樂院送納。一檢照章穆皇后故事。遷座于萬安宮。宰臣王旦等見帝于萬安殿之別次奉慰。是日輔臣節度使兩省五品尚書省四品諸司三品以上。並入臨於萬安宮庭。文武百官諸軍將校內諸司使副以上。並臨於宮門之外。乞從御史臺等處告集文武百僚。赴別殿門外立班發哀。內諸軍將校依禮例於本營發哀。一檢照懿節皇后上僊禮例。臨安府見在寄居待闕官不該赴別廟立班。文武百官乞依禮例。並赴臨安府公廳發哀。一檢照懿節皇后上僊典故。發哀日時。前皇帝自內服常服至御幄。俟時將至。皇帝就幄。易皂幘頭。白羅衫黑銀帶。百僚就幕次去金玉飾服。皂角帶次。百僚入詣別殿下。並

北向立定。俟時至，皇帝就幄內舉哭，百僚就位皆舉哭，畢退。皇帝服皂幘，頭白羅衫，黑銀帶，還內。欲乞依上件禮例。一發哀時，太史局選定，宜用。今月二十五日坤時。一檢照懿節皇后上僊禮例，合聲鍾五萬杵。欲乞令臨安府裏外諸寺院，自六月二十五日為始，共聲鍾五萬杵。一檢照懿節皇后禮例，依故事，百司行移，欲並稱大行皇后。詔依。同日又言，皇后上僊，所有皇太子親王發哀之服，今欲比做禮例。於百僚發哀時，前入詣本殿，服皂幘，頭白羅衫，黑角帶，發哀。其幘頭衫帶，並乞令文思院製造。詔依。同日，詔差賈竑充都大主管官。七月一日，禮部太常寺言，大行皇后上僊，依禮例，合奏告天地宗廟社稷，天慶觀報恩光孝觀太一宮諸陵攢宮，所有合排辦事件，依自来奏告禮例排辦。據太史局選用七月四日巳亥，依例分作兩日行禮。其奏告官天地社稷宮觀，乞差侍從宗廟諸陵攢宮，乞差南班宗室，詔依。入臨。乾道三年六月二十五日，禮部太常寺言，今來皇后上僊，檢照章穆皇后典故，按孝明皇后故事，皇帝未成服，群臣日赴萬安宮一臨。今欲乞依禮例，皇帝未成服，文武百僚赴別廟，日一臨。詔依。同日又言，今來皇后上僊，文武百僚赴別殿入臨，合用香五合。乞令入內侍省請降付本殿，其香案香爐炭火匙合等，並乞令都大

主管所下諸司排辦。詔依。二十六日，禮部太常寺言，皇后上僊，今檢照懿節皇后上僊禮例。六月二十八日，文武百僚赴別廟入臨。緣同日係欽慈皇后忌辰，行香日分委有相妨。今欲乞除皇太子親王赴臨立班外，其文武百僚止赴景靈宮行香，免赴入臨。詔依。入臨儀。其日，文武百僚服常服，守和寧門入赴皇城門幕次，去金玉飾，易黑帶，以俟皇太子親王詣殿下兩拜訖。引皇太子升殿，詣香案前。三上香，退復位。舉哭十五音。兩拜訖，退。次御史臺閣門太常寺分引宰執文武百僚詣殿下立班定，揖躬兩拜訖。禮直官引班首升殿，詣香案前。三上香訖，退復位。舉哭十五音。兩拜訖，退。歸幕次。易吉帶，退。內有職事相妨，免赴立班。乾道三年六月二十六日，禮部太常寺言，皇后上僊，今檢照懿節皇后禮例，未祔廟以前，所有宗廟祭及中小祀，特不停罷。今來皇后上僊，未祔廟之前，乞依禮例祀祭，特不停罷。詔依。禁樂。乾道三年六月二十六日，禮部太常寺言，今來皇后上僊，欲乞依懿節皇后禮例，除祭天地宗廟社稷，用雅樂外，其餘祀祭雅樂，欲乞備而不作。其行在樂，自舉哀後，權行禁止。俟祔廟畢，日舉用。及乞依禮例，指揮下日，令臨安府禁屠宰一日。詔依。同日又言，今來皇后上僊，成服，欲乞依禮例。諸州軍并所屬縣鎮，候指揮

到日管內寺觀修建道場三晝夜并禁樂三日及禁屠宰一日詔依小  
欽 乾道三年六月二十五日皇后上僊都大主管所奏太史局選大行  
皇后寄梓宮小欽宜用六月二十六日壬辰時宜用坤時詔依 大欽  
乾道三年六月二十六日禮部太常寺言據都大主管所申太史局選大  
行皇后梓宮大欽破服立銘旌宜用七月二日丁酉收髮掛服立重宜用  
七月七日壬寅竊緣自大欽至掛服相去日分差遠今檢照昨顯仁皇后  
故事係九月二十日上僊二十三日大欽破服立銘旌收髮掛服立重並  
用當日所有今來大行皇后大欽破服立銘旌掛服立重欲乞依昨顯仁  
皇后體例並用七月二日所有時刻乞下太史局選擇詔依 太史局選到  
大欽破服立銘旌時宜用其日乙時掛服立重宜用其日丁時二十七日  
禮部太常寺言今來大行皇后上僊大欽今檢照禮例條具事件下項  
一大欽時前依禮例都大主管官先行祭告禮 一合用祝文一首述以  
大行皇后大欽時前遣官行祭告禮之意乞下學士院修撰 一合用御  
封降真香一合乞下入內侍省請降 一供養茶酒果祭食并香案香  
爐匙合炭火燎草拜褥等係諸司排辦詔依 二十八日禮部太常寺言  
今來大行皇后上僊大欽畢欲乞皇太子皇子詣大行皇后殿下再拜訖

皇太子升殿三上香跪奠茶酒降復位舉哭再拜訖退詔依 大欽儀  
其日俟排辦訖大欽時前都大主管官詣香案前北向再拜訖搢笏上香  
再上香三上香跪執盞酌茶三奠酒執笏俛伏興少立俟剋擇官讀祝文  
訖請再拜訖俟時大欽 成服 乾道三年六月二十五日禮部尚書周  
執羔等劄子今來皇后上僊依典故文武百僚合服齊衰布頭冠白幘頭  
大袖襪衫腰經依故事三省樞密院主事以上係主事以上有官人服孝  
服餘不服并御史臺閣門太常寺引班祗應人各合服孝服今欲乞依上  
件故事製造內引班無官人止服布幘頭大袖襪衫腰經並乞下臨安府  
製造兼契勘見任職事官合製造孝服外所有寄居待闕文武官依例給  
布一疋自行製造劄下臨安府依所乞事理施行 二十六日禮部尚書  
周執羔等劄子今來皇后上僊檢照孝明皇后崩皇帝成服服齊衰布頭  
冠幘頭大袖襪衫裙袴腰經桐杖皇子亦衰服加布斜巾帽首經絹襯服  
所有今來皇帝皇太子皇子所服欲依上件典故其皇太子妃并皇子夫  
人所服別無的確典故外今欲比附公主典故服布帕頭帔裙衫首經絹  
襯服並乞下文思院製造內皇帝衣服赴御藥院送納及檢照懿節皇后  
故事皇帝成服並服孝明皇后禮例製造續奉指揮不用桐杖欲乞依上

件禮例。詔依。同日。禮部太常寺言。今來皇后上僊。今檢照懿節皇后典禮。參酌討論下項。一勘會行在諸軍將校。已降指揮於本營發哀外。所有將來成服依禮例。除統制統領官成服外。其餘將副并部隊將管隊使臣并散使臣。陞朝官以上及將校副指揮使以上常服。哭於本營廳事。三日而止。其常日朝殿祇應排立行門禁衛班直將校副指揮使以上。御前忠佐百官赴臨。去色衣臨於殿門外。今欲乞依上件禮例施行。一勘會外路駐劄諸軍去處依禮例。合就所屯軍去處。俟報到自副將而上成服。其餘部隊將至副指揮使以上並常服。哭於本營廳事。三日而止。今欲乞依上件禮例。內沿邊州軍駐劄去處依禮例。更不舉哀。俟指揮下日。令進奏院關報。詔依。同日又言。今條具下項。一依禮例。諸路監司州軍縣鎮長吏以下。令服布四脚條幘頭直領襖衫。上領不盤腰經。以麻其所造衣服。乞令所在州軍製造。一欲乞依禮例。行在并諸路州軍縣鎮士庶於本家素服。三日而除。婚嫁除服後不禁。行在自成服日為始。諸路州軍候計告到日為始。一欲乞依禮例。沿邊州軍縣鎮並不舉哀。一逐項事理。候今降指揮下日。令進奏院遍牒契勘士庶素服。依禮例條去顏色衣服。止服淺淡素青皂頭巾。詔依。同日又言。今條具下項。一御前禁衛行門

班直親從快行親事。輦官自皇帝成服後。如遇朝殿等。欲乞依禮例。並服紫衫黃帶子頭帽。至皇帝釋服了日依舊。一將來文武百官成服後。有乘花繡鞵者。欲乞依禮例。並易以皂鞵。至釋服日依舊。詔依。二十七日。禮部太常寺言。檢會欽聖憲肅皇后上僊。二第及顯仁皇后上僊。韋誼等姪。並服衰服。終三年之喪。若入皇城門。權易墨衰。由權開門入出。所有逐七百日止。合在家設位行禮。其掛服日。合於當日掛服時。內於權開門外。便服衰服入。赴立班。所有今來大行皇后之弟夏執中。欲乞依上件禮例。詔依。同日。禮部尚書周執羔等劄子。大行皇后上僊。已檢照典禮。畫降指揮。皇太子皇子亦齊衰服。加布斜巾。帽首經。縮襯服。攷之禮記。問喪篇。有子不用杖之文。為尊者避故也。今欲依禮經。更不用杖。詔依。同日。禮部太常寺言。檢照懿節皇后上僊。禮例。皇帝成服。并釋服日。及釋服後。至禘廟前。遇朔望日。皇帝不視事。文武百僚於常御殿門外。進名奉慰。所有今來大行皇后上僊。欲乞依禮例。皇帝成服。并釋服日。及釋服後。至禘廟前。遇朔望日。皇帝不視事。文武百僚於後殿門外。進名奉慰。詔依。同日又言。成服畢。皇帝行祭奠之禮。今檢照懿節皇后典禮。條具下項。一合用香案香爐。是合炭火湯瓶。注碗盤盞。托奠茶酒。孟子鈔鑪盆臺燎草等。并

焚祝版燎草燈火。並乞從都大主管所下諸司排辦。一合用御幄施廡於別殿側。隨地之宜。并御座黃羅裯褥。奏請紫褥。乞下儀鸞司排辦。一合用祝文一首。述以皇帝為大行皇后成服訖行祭奠之禮。乞下學士院修撰。一合用御封降真香一合。乞下入內侍省取降。一合差讀祝文官一員。於史官內差。一合差侍香并進茶酒捲簾舉祝版內侍。乞下入內侍省差。一合差定時剋擇官二名。乞於都大主管所剋擇官內差。一名於殿內。一名入殿門外百僚幕次前。一成服日。至時如遇雨降泥濘。乞令文武百僚止於別殿門外幕次。俟時掛服訖。隨地之宜。權立。止乞宰執及見今赴臨入殿立班。官於殿門內外隨宜立班。一合差前導太常卿一員。贊引太常卿太常博士一員。乞差太常寺少卿博士充。一依禮例。成服日。百司作休務假一日。詔依。二十八日。禮部太常寺言。今來大行皇后上僊成服日。皇帝行禮。欲乞皇太子皇子詣殿下同百僚立班。詔依。二十九日。禮部太常寺言。所有其餘日。皇太子皇子至大行皇后宮中哭泣。如家人之禮。詔依。同日又言。成服畢。欲乞至日俟文武百僚後殿門外進名奉慰訖。次詣德壽宮殿門外進名奉慰。光克壽聖太上皇帝。次移班稍東進名奉慰。壽聖太上皇后。詔依。同日又言。儀鸞司狀契勘所管

陳設係是日常應奉之物。所有今來應干釘設所用陳設名色。亦各下所屬討論指定。若有改易名色。候指揮下日。報臨安府兩浙轉運司製造關借。禮畢拘收。奉聖旨。依令禮官討論指定。今討論指定。除大行皇后殿陳設合用白素外。所有殿側所設幄次用青素。其餘陳設係是時暫即難改易。詔依。同日又言。今續次討論。合行典禮。一今來大行皇后上僊。欲乞依懿節皇后禮例。成服日。百官服常服。吉帶入皇城門內幕次。服袞服立班。訖。就次易常服。去金玉帶魚袋。服黑帶。進名奉慰訖。出皇城門。其第二第三日入臨。准此。唯不奉慰。至釋服依舊。一昨顯仁皇后例。文武官成服入臨。并奉慰訖。既出內門。並服白頭巾素服白帶子。所有今來文武官成服入臨。并奉慰後。在外所服。欲乞依工件禮例。至除服日依舊。一今來成服日。三省樞密院等處無官人。欲乞依懿節皇后禮例。素服三日。詔依。二十九日。禮部太常寺言。今具昨懿節皇后禮例。參酌申請下項。一成服三日。每日朝臨。文武百僚並合詣別殿立班。係於七月二日三日四日朝臨。其行禮儀注。即合依見今入臨儀注。一合用香三合。乞令入內侍省請降付本殿。其香案香爐炭火匙合等。乞令都大主管所下諸司排辦。一依禮例。入內侍省并內侍省官所服孝服。若隨從車駕至

几筵殿即合服著。所有今來入內侍省官所服孝服。欲乞依上件禮例。若隨從車駕至大行皇后別殿。即合服著。詔依。同日。禮部尚書周執羔等言。今來光堯壽聖太上皇帝壽聖太上皇后舅姑爲婦。雖是服期。檢照國朝會要典故。即無該載。止有爲宗室大功以上親。合舉哀成服。凡發哀設次於後苑壬地。前一日所司預於舉哀所設幕殿。周以簾帷。色用青素。服素白羅衫皂幘頭黑銀腰帶。行舉哀成服禮。今來光堯壽聖太上皇帝欲乞比附上件禮例外。壽聖太上皇后所服禮制。今叅酌會要典故。合服碧羅帕頭。帔白羅寬袖衫淡黃縠子裙。欲乞依上件禮例。於七月二日成服。時於德壽宮後苑壬地設幄。爲大行皇后舉哀成服之禮。所有合造衣服。乞下文思院製造供進。其儀範令太常寺檢會供報。伏乞特賜敷奏。德壽宮取旨。恭奉太上皇帝聖旨。依禮官擬定。成服儀。其日。時禮直官太常博士太常卿先詣幄前立候。皇帝自內服皂幘頭白羅衫黑銀帶。絲鞋詣別殿側御幄。即坐簾降。俟時至。禮直官太常博士引太常卿當幄前。俛伏跪奏。太常卿臣某言。請皇帝爲大行皇后上僊成服。奏訖。伏興。太常卿太常博士禮直官並權退易服訖於幄前立。皇帝釋素服。服期服。文武百僚於別殿門外。同時易服訖。御史臺閣門太常寺報引文武百僚入詣

殿門內外隨宜立班定。禮直官先引讀祝文。官詣香案之西。東向立候。皇帝服期服訖。閣門報班齊。在位官皆再拜訖。簾捲。禮直官太常博士太常卿前導皇帝出幄。詣香案前。奏請上香。再上香。三上香。內侍進茶酒。又奏請酌茶。三奠酒。又奏請少立。讀祝文。官東向跪。讀祝文訖。奏請皇帝舉哀。在位官皆舉哀。俟哭止。又奏請致欽。不拜。前導官前導皇帝。在位官皆再拜。俟皇帝歸幄次。文武百僚前導官退歸次。換常服黑帶。詣後殿門外進名奉慰訖退。殿攢。乾道三年七月一日。禮部太常寺言。今來大行皇后上僊。檢照章穆皇后懿節皇后禮例。俟大歛訖。合選日殿攢。今來大歛已定。七月二日。所有殿攢日時及祭土時。并殿攢方位。太史局選用七月七日壬寅祭土。殿攢時。並宜用當日丁時。殿攢方位宜於本殿東南利方吉。詔依。二日。禮部太常寺言。今來大行皇后梓宮殿攢。今條具下項。一依禮例。殿攢日不視事。群臣奉慰。一殿攢合用相擊籠帳及合用物色等。欲乞依禮例。令都大主管所下所屬排辦。一殿攢日。百司作休務一日。一合用御封降真香二合。祝文二首。一首述以爲大行皇后殿攢時前遣官行祭告之意。一首述以皇帝爲大行皇后殿攢行燒香禮之意。一合於大行皇后殿側。設青素御幄。施簾設相褥等。合用香案器皿等。差

前導讀祝文官侍香等內侍官等欲乞並依成服禮例。一合用祭告并行燒香禮供養食并茶酒果。乞都大主管所行下諸司排辦。一殿橫時前祭告行禮官欲乞差都大主管官。一檢照顯仁皇后殿橫行禮日百官已釋服。皇帝未釋服。所有陪位立班官係用成服日臨於殿庭立班官易衰服陪位。其班于殿門外官不入陪位。止令常服去飾。以俟奉慰畢退。今未大行皇后殿橫行禮陪位立班官并奉慰欲乞並依上件禮例。內殿橫行禮陪位欲乞皇太子宰執親王使相侍從兩省臺諫見任卿監郎官管軍知閣橫行御帶環衛官立班。詔依。殿橫時前行祭禮儀。其日俟排辦足備。引都大主管官常服黑帶。詣大行皇后梓宮前北向再拜訖。搢笏跪。三上香奠茶。三奠酒訖。執笏俛伏興。少立。陰陽官讀祝文訖。都大主管官再拜訖。以俟太史局報時。及引都大主管官監視殿橫。殿橫皇帝行禮儀。其日文武百官常服吉帶入皇城門幕次。合赴殿庭陪位。官就次易衰服。以俟陪位。其班于殿門外。官就次易常服黑帶。以俟奉慰。俟殿橫訖。御史臺閣門太常寺分引行事陪位官入詣大行皇后殿橫殿下就位立班定。讀祝文官於香案前立。前導太常卿太常博士禮直官並於御幄之前立。皇帝服期服詣幄即座。閣門報班齊。禮直官太常博士引太常

卿當幄前俛伏跪奏。太常卿臣某言。請皇帝為大行皇后殿橫行燒香之禮。奏訖。伏興。退復位。在位官皆再拜訖。簾捲。前導官導皇帝出幄。詣大行皇后梓宮香案前上香。再上香。三上香。內侍進茶酒。又奏請奠茶奠酒。再奠酒。三奠酒。奏請少立。讀祝文官東向跪。讀祝文訖。又奏請舉哭。皇帝舉哭。在位官皆舉哭。俟哭止。又奏請致欽。不拜。前導官前導皇帝。在位官皆再拜。皇帝歸幄。簾降。陪位前導官退歸幕次。換常服黑帶。以俟與侍班奉慰。文武官並詣後殿門外進名奉慰訖。次易吉帶退。御殿。乾道三年六月二十八日。禮部太常寺言。今未大行皇后上僊。檢照章穆皇后懿節。皇后禮例。群臣釋服後。皇帝便殿視事。權易忌日之服。俟皇帝釋服後。常服前殿視事。今欲乞依上件禮例。兼契勘見今係後殿坐。亦乞依已降指揮施行。詔依。七月五日。閣門言。為大行皇后上僊。皇帝釋服畢。自今月九日後殿坐。詔依。閏七月四日。禮部太常寺言。閏七月三日至七日。緣係在安恭皇后梓宮啓橫未發引之內。并閏七月十八日卒哭。并二十一日祔廟日。依已降指揮前後殿不視事。所有閏七月八日安恭皇后梓宮發引掩橫畢。其已後視事日。分理合酌宜申請。今欲乞除九日虞主回奉迎。十日旬假。十一日祔廟受誓戒。十五日望日奉慰。二十日祔廟。前一日



致齋並前後殿不視事。其餘日分並乞依先降指揮後殿坐。內閣七月九日。俟奉迎虞主畢。作休務假。詔依。

按地

乾道三年七月二日。禮部太

常寺言。今檢照章穆皇后故事。命內侍左班副都知閻承翰為園陵按行使。入內副都知藍繼宗副之。昨昭慈聖獻皇后攢宮止差入內內侍省押

班梁邦彥為按行使。并顯仁皇后攢宮按行使。差吏部侍郎葉義問。副使差入內內侍省都知衛茂實。今來大行皇后攢宮按行使。副合取朝廷指

揮。詔按行使。差周執羔。副使差賈竑。宋會要七月二日。詔以岳陽軍節度使

開府儀同三司充萬壽觀使居廣為總護使。刑部侍郎史正志為頓遞事。

禮部尚書周執羔為按行使。賈竑為按行副使。故事園陵當差五使。昭

慈聖獻顯仁皇后攢宮。止差總護頓遞二使。又園陵按行使故事。差內侍

正副二員。顯仁皇后攢宮差侍從官為使。內侍副之。故今皆遵用之。五日

試禮部尚書周執羔。入內內侍省押班賈竑言。已降聖旨。攢殯去處就安

穆皇后攢宮。今來本司前去相視。欲乞依例恭詣安穆皇后攢宮朝謁。詔

依。十一日。太常寺言。按行使周執羔。副使賈竑奏。臣等今月八日躬親

將帶剋擇官禮直官。相視到攢宮地段。今取到逐人文狀。奉聖旨。今太常

寺看詳申尚書省。一太史局狀。契勘今來安穆皇后攢宮殿宇門戶並

皆北向。今相視得殿東地一段。林木榮盛。堪充大行皇后神穴。即與國音

并陰陽經書並無妨礙。宋會要九日。中書舍人兼權直學士院洪邁言。竊以

國家多事。費用百出。凡所施為。當節以制。今大行皇后喪事。一切引用顯

仁皇太后舊例。畧以裁減為名。總護使官屬至三十九人。夫以十里之間。

一日之事。內有都大主管治其目。外有兩浙漕臣供其費。而所置僚屬雖

宰執出使。開置軍府。蓋未嘗有此數。且周執羔為按行使。史正志為頓遞

使。其所差官。比之前例。十去其八。三使一也。或多或寡。於理安在。按之事

理。總護一司。官屬不宜過十人。欲望特賜裁處。仍自今有所陳請。皆從朝

廷審處。具奏從之。一禮直官狀。相視到大行皇后攢宮地段。係在安穆

皇后攢殿之右。內圍牆之東。安立大行皇后神園神穴。即無妨礙。契勘見

今安穆皇后攢殿東內圍牆。至東壁外圍牆。禁地係三十丈。其外圍牆乞

更不增展。所有大行皇后攢宮內圍牆。乞隨宜修奉。一臣等契勘今來

所按上件地段。如太常寺看詳得其地委無妨礙。伏望睿旨許臣等。標劄

神穴神園。本寺今看詳即與典禮別無妨礙。詔依。同日。大行皇后攢宮

揮許用上件地段。候指揮下日。本局指引於安穆皇后攢殿東。一列標劄

按行使司言相視到大行皇后神穴地段。今有合申事件。一將來大行皇后神穴。若降指揮許用。今來相視到安穆皇后攢殿東地段。合行依例擇日。差官祭告安穆皇后畢。應時差修奉人匠。除去妨礙窠木圍牆屋宇等。次行標劄神穴。一合用御封降真香一合。祝文一首。述以爲修奉大行皇后神穴神園。除去妨礙窠木圍牆籬寨屋宇等祭告之意。一合差祭告官一員。依禮例係從按行使司。就差本司幹辦公事屬官文臣充。所有今來按行使司幹辦公事屬官。並不曾差置。欲乞從按行使司牒臨安府。差職官一員充。祭告官并太祝一員。並前一日赴脩吉寺致齋。至日行事。一祭告日時。乞令剋擇官選定。申按行使司行下所屬排辦。一供養牙盤食茶酒果等。並乞下臨安府排辦。一奠茶酒盂子鈔鑪盆臺香爐。匙合梳櫛茶酒盞等。並乞令安穆皇后攢官司排辦。一祭告并祭土破地吉日時刻。宜用七月十八日丁時。隨時除去窠木等。標劄神穴祭土破地時。宜用其日辛時。並宜於正北偏東癸位興工。一禮直官狀。檢照昨顯仁皇后攢宮禮例。祭土行禮已降指揮。係令按行使或副使前去祭土行禮。所有今來大行皇后攢宮祭土。欲乞按行使行禮。按行副使陪位。詔依。十六日。按行使司言。據禮直官狀。今來大行皇后攢宮。欲乞禮例。俟

修奉將畢。按行使副於發引前恭詣攢宮。按行瑩域畢回次。至大行皇后梓宮發引日。再詣攢宮。俟掩攢奉辭畢回。詔依。修奉攢宮。乾道三年七月一日。禮部尚書周執羔等言。今來皇后上僊。所有將來攢殯去處。伏乞朝廷敷奏取旨。詔就安穆皇后攢宮。二日。禮部尚書周執羔等言。今檢照差修奉官典故。章穆皇后園陵。命入內副都知藍繼宗。內殿崇班張繼能。三陵都監康仁。遇高品閻文度。同監修園陵步軍都虞候鄭誠。爲都鈐轄。孫正辭。副之。昭慈聖獻皇后攢宮。修奉總管差韓世忠。修奉都監楊公弼。顯仁皇后攢宮。修奉總管差趙密。都監差王晉錫。承受差馮孝宗。候指揮。詔修奉總管差郭振。都監差林肇。承受差劉慶祖。宋會要七月一日。臣僚上言。臣竊見自大行皇后上僊。陛下首差內使省押班賈竑。爲都大主管官。付以一切喪事。可謂簡而得其要矣。然臣竊見差坊之次日。又置承受官一員。其次日。又置主管支費官二員。其次日。又置主管事務官一員。各置司開局。辟置官屬。無慮二十員。各支破請給驛券。至於逐料銀絹日給食錢。下及吏卒差次而支。雖名比舊。三分減一。總而會之。已不可勝計。欲乞併省。止從諸司。見任官內選差。兼領以免添破請受之費。痛裁吏卒人數。制爲日限。庶免亡益妄費從之。二日。詔以主管侍衛步軍司公事郭

振爲修奉總管。入內內侍省押班林肇爲都監。唐思殿祇候劉慶祖爲承  
受。故事園陵有監修官。及鈐轄都副。至昭慈聖獻皇后攢宮。止差修奉  
總管都監各一員。顯仁皇后攢宮。又有承受內臣一員。故今遵用之。四日  
詔委差姜詵。應辦大行皇后攢宮營造并錢糧。六日。禮部太常寺言。依  
故事修奉攢宮。合用十二神等。係工部下文思院計會。太史局修置。詔依  
七日。禮部太常寺言。准尚書省劄子。主管侍衛步軍司公事郭振。入內  
內侍省押班林肇狀。准勅差大行皇后上僊。修奉攢宮總管都監。其合行  
事件欲乞參照。昨修奉顯肅皇后顯仁皇后攢宮。前後已得指揮。今未修  
奉攢宮事。干典禮。合用上下宮制度等。乞下禮部太常寺討論。降下圖本  
修奉。奉聖旨。依今討論。欲令修奉官司。參酌比附安穆皇后攢宮體式。隨  
宜修奉。所有神御下宮依禮例。係就安穆皇后攢宮下宮殿內一就安奉。  
亦乞令修奉官司。隨宜添修詔依。同日。詔差周淙同姜詵。應辦大行皇  
后攢宮營造并錢糧。十二日。禮部太常寺言。准尚書省劄子。大行皇后  
攢宮。修奉使司狀。契勘大行皇后攢宮修奉。應合用竹木磚瓦灰石等物  
料。已令漕臣應副。今來合先次下手。斫事磚瓦石段等工役。伏乞朝廷下  
有司討論指定。下手興工。并破土日。分及祭告禮例。降下。以憑遵守。奉聖

旨。令禮部太常寺討論。申尚書省。今具下項。一下手斫事磚瓦石段等  
工役興工日。分欲乞令修奉使司下太史局選定。俟香祝降到安穆皇后  
攢宮。於所選興工日五更祭告。其破土日。分係按行使已行選定。一今  
來攢宮興工。緣附近安穆皇后攢宮。依禮例。合行祭告。合用御封降真香  
一合。祝文一首。述以修奉大行皇后攢宮。下手備近興工之意。及合用牙  
盤食茶酒果等。并差祭告官太祝各一員。並依按行使司體例。關報所屬  
排辦差官。詔依。二十二日。禮部太常寺言。准都省批下檢察官陵所申  
乞立大行皇后攢宮司名事。批送禮部指定。申尚書省。今指定欲稱安穆  
皇后安恭皇后攢宮司名。詔依。閏七月一日。禮部太常寺言。准都  
省批送下安恭皇后攢宮。總護使居廣申契勘舊例。攢宮修奉一切畢。工  
總護使定日前往檢視。緣當來係在紹興府。今來安恭皇后攢宮。止在臨  
安府。將來畢工。竊恐朝廷前去檢視。未審居廣更合與不合。依舊例前去  
檢視。批送禮部太常寺看詳。申尚書省看詳。今來安恭皇后攢宮。將來畢  
工。欲乞依例。令總護使前去檢視。詔依。議謚號。乾道三年七月一日。  
禮部太常寺言。國朝園陵故事。尚書省集官擬謚。係用侍從臺諫。以上并  
禮官集謚。六曹郎官以上書謚。今來大行皇后集謚。欲依上件故事。伏乞

朝廷取旨降下集謚日分太史局選到七月七日壬寅二十一日丙辰詔用七月七日。同日又言。檢照孝明孝惠皇后感。俟百官議定謚號。制下之後。行冊之前。止命官告太廟。告訖上於靈座。今來大行皇后謚號。乞依上件典故。俟集官議定謚號。勅下後奉冊之前。遣官奏告太廟別廟。訖奉謚冊寶上於靈座。詔依。同日又言。今來大行皇后上僊。依禮例合差撰議官一員。詔差王曦。六日。禮部太常寺言。今來俟謚號。勅下後奉冊之前。依安穆皇后禮例。遣官奏告太廟別廟。今具合行事件下項。一奏告日辰。候勅下日。乞令太史局選定。一合用御封降真香一十三合。祝文一十三首。並述以皇后夏氏謚號。勅下奉冊前期奏告之意。一合用白幣一十三段。各長一丈八尺。熟白絹充。一奏告每室。各合用酒脯麻鷄茅蠟燭上香水炭等。並乞令臨安府排辦。一奏告官一員。依禮例係差南班宗室充。一光祿卿奉禮郎太祝太官令各一員。乞令太常寺官充。詔依。十七日。禮部尚書周執羔等言。臣聞厚載承乾。備動靜有常之德。靈陰儼日。全著明莫大之功。惟君宅尊。立后作配。蓋五教天叙之典。而二南王化之基。以綱大倫。以熙內治。嬪虞之媯。汭翼夏之塗山。或來嫁于周京。或親迎于渭溪。自家而刑國。振古而至今。是故建位而按漢儀。生則冠長

秋之號。定名而攷周謚。沒則流永世之芳。揆厥所元。誠百王不易之彝憲也。恭惟大行皇后。軒象鍾輝。層沙儲慶。出炳倪天之異。蚤彰偃月之休。淵覲其衷。柔明而慧。哲王釋其度。和懿而溫文。自相宗藩。肆媿宸極。居守箴圖。謹法度也。動循環佩。肅威儀也。澣濯而服。崇節儉也。鷄鳴而起。勤輔佐也。弗邇濯龍之遊。而思賢之憂切。弗紊貫魚之序。而逮下之仁均。有警戒之道。而屢省休成。無險詖之心。而盡捐私謁。至若靈承於九廟。致養於兩宮。銜統紘紼。隆禮以奉宗祀之重。總筭櫛縱。思媚以盡婦道之常。以贊奉先之誠。以助寧親之孝。此徽德令範。遐哉卓乎。不可尚已。芳齡未究。淑命弗融。黃屋興悲。彤闈墮涕。禕瑜之不御。詔典冊之可稽。問諸外朝。謀及卿士。叅之大同。殆將熙鴻。號於無窮也。謹按謚法曰。莊敬盡禮曰安。敬事尊上曰恭。大行皇后。中正齊莊。率履弗越。茲不曰安乎。雍怡祇順。謹事匪懈。茲不曰恭乎。揚其盛之名。表最高之行。豈不慰神心而當輿議哉。伏請謚號曰安恭皇后。謹議。詔依。十九日。給事中兼直學士院兼侍講王曦奏。臣伏奉勅命。差臣撰大行皇后謚號者。臣謹上議曰。歷選列辟之興。必有內治之助。四妃登于帝嚳。二女釐于有虞。塗山翼夏后之昌。大妣配文王之聖。於時謚行。未及婦人。中古以還。禮文聿具。則有備物顯冊。極位號於

生前。禮典隱書。致追崇於歿後。有若安正順承。以象坤元之至。直方敬義。以昭地道之光。乃知揚徽音表懿行。受大名而惟稱。節壹惠而可書。垂百世以常存。有兩言而可定。恭惟大行皇后。玉粹其度。淵靚而衷。慶推渭涘之祥。德載河洲之美。日角偃月。則異表之茂。龍星麗天。則正位之符。厥自榆翟撰儀。穀圭啓瑞。金螭玉檢。以焜耀於宮壺。文織絲組。以寅奉乎齊明。無險詖私謁之心。有警戒相成之道。若其服勤蘋藻。率以禮也。動中環佩。翼以敬也。往裳無飾。節以儉也。貫魚有序。施以恩也。謹七篇之誠。躬四行之先。何其賢也。玩聲詩之長。得風雅之致。何其文也。方饗紫闈之奉。俄罹白柰之詳。想遺音而不聞。悵陰儀之遂闕。萬目痛新宮之飾。皇心懷故劍之悲。宜陳誅行之文。以正易名之制。謹按謚法。莊敬盡禮曰安。敬事尊上曰恭。今大行皇后。防抑逸欲。而內無出閫之言。杜絕奢盈。而權無私昵之授。非莊敬盡禮乎。勞心曲體。以躬嬪則之柔。秉禮含章。以謹尊親之奉。非敬事尊上乎。伏請上謚號曰安恭皇后。詔依奉謚冊寶。乾道三年七月四日。禮部尚書周執羔等言。今來皇后上僊。今檢照禮例。合行修製謚冊寶。并沿冊寶法物。今欲乞依禮例施行。詔依。同日。禮部太常寺言。今來大行皇后奉謚冊寶。依禮例合差撰謚冊文官一員。書謚冊文官一員。

篆謚寶文官一員。詔撰謚冊文官可差蔣希書。謚冊文官差陳俊卿。兼篆謚寶文官。九日。禮部太常寺言。將來奉大行皇后謚號冊寶。上於靈座前行禮。今檢照懿節皇后禮例。條具事件下項。一奉謚冊寶日。依禮例。皇帝前後殿不視事。是日百司作休務假一日。一奉謚冊寶。上於靈座前。禮畢。日依禮例。文武百僚詣後殿門外進名奉慰。一依禮例。合前二日。奏告天地宗廟社稷宮觀。一奉謚冊寶。上於靈座前。合用御封降真香一合。所有太傅以下。行事官并陪位文武百僚。依禮例。並服常服黑帶。權去金玉飾立班行事。一靈座前。合用香爐。匙合等。乞從都大主管所行下所屬排辦。其合用供養食茶酒果。乞從主管諸司排辦。一行禮畢。其謚冊寶。并沿冊寶法物。依禮例於別殿安奉。令本殿官交割收管。至發引日。降出交付禮部陳列。一修製謚冊寶了畢。擇日行奉謚冊寶之禮。欲乞依例。令文思院約度畢。工月日。申太常寺。下太史局。選定日辰。報本寺申請。一依禮例。專差內侍官二員。掌管進呈謚冊寶。訖降出。乞下入內內侍省。差官乞令文思院於奉謚冊寶。上於靈座行禮。前二日。奉謚冊寶。計會所差內侍進呈。訖於前一日。降出詣祥曦殿門外。交付禮部。以俟從衛至。謚冊寶。幄安奉。至日行禮。一今來奉謚冊寶。上於靈座前。合差

都大主管官一員。乞就差大行皇后喪事都大主管官一就主管施行。一依禮例。奉謚冊寶太傅以下行禮官都大主管官等。並各於奉上前一日宿齋。今欲乞前一日太傅自祥曦殿門外從冊寶至幄次。退宿齋於都堂。其餘行禮等官。並宿齋於本司。至日絕早赴別殿行禮。一合差讀寶官一員。讀冊官一員。乞差侍從官。舉冊官二員。舉寶官二員。差禮部太常寺官。並前一日宿齋於本司。詔依。同日禮部太常寺言。將來大行皇后奉謚冊寶上于靈座。合差太傅一員。依禮例係差宰臣。詔依。十七日禮部太常寺言。奉謚冊寶上于靈座前。合用日辰。太史局選用七月二十四日巳未。時宜用其日乙時。詔依。同日又言。今來大行皇后謚號已降勅下。欲乞應干行移等依禮例。候奉上謚號冊寶了日。合稱安恭皇后。其修製謚號冊寶內寶文。欲乞以安恭皇后之寶六字爲文。詔依。十八日禮部太常寺言。七月二十四日。奉大行皇后謚冊寶上於靈座前。依禮例前二日。奏告天地宗廟社稷天慶觀報恩光孝觀太一宮。各合差奏告官一員。乞差侍從。內宗廟差南班宗室。詔依。二十一日。大行皇后喪事都大主管所言。據太史局狀。今月二十四日。大行皇后奉謚冊寶畢。合換立安恭皇后銘旌。時宜用其日丁時。所有換下大行皇后銘旌。宜於本殿正南偏西丁

位。歲空方焚燒。詔依。謚冊文。維乾道三年。歲次丁亥。七月丙申朔。二十四日巳未。皇帝詔曰。古我先王。必立厥配。釐爾女士。爰御于邦。治蓋自於家齊。風寔繇於近始。茲本人倫之至。式恢王化之基。帝女于時。乃降僞汭。天作之合。是嬪周京。睠于內助之良。媿彼前聞之懿。方共資於淑範。俄永謝於徽音。重翟副珈。生既有以。極其寵。祿章。愍冊。沒則有以。揚其休。大行皇后夏氏。婉嫕而純明。閑和而靖順。卓爾挺操。在河之洲。穆然凝輝。于渭之涘。蚤兆玉衣之瑞。合承金屋之華。含章在中。發秀于外。粵從初載。寔相潛藩。肆朕纂承。嘉乃輔佐。夙夜警戒。而有相成之道。朝夕思念。而無私謁之心。推樛木逮下之仁。樂關雎進賢之義。服澣濯而崇大練。以純儉爲民彝。謹珩璜而應和鑿。以肅雝爲嬪則。造次動遵於圖史。從容雅播於聲詩。鷄初鳴而至寢門。同謹兩宮之間。蠶於郊而供祭服。每虔九廟之承。薦臻粟於舅姑。奉粢盛於宗廟。朕方上隆孝道。親親而天下平。爾能中叙壺儀。婦婦而家道正。自建長秋之位。甫臨再閏之期。何馳隙於分陰。頓沉光於曉魄。當厚飾終之典。用摠悼往之懷。訪厥攸司。諏之列辟。按柔芳於彤管。考茂實於椒塗。大酌僉前。共熙鴻號。謂治內盡安行之德。宜循由舊之稱。謂奉上竭恭事之誠。宜表最高之行。備陳顯數。克播令猷。謹遣攝太傅

左正奉大夫守尚書左僕射同中書門下平章事葉顥奉寶冊謚曰安恭  
皇后伏惟哲靈如存休問不息賁于太史光于清柘於萬斯年與宋無極  
嗚呼哀哉 奉謚冊寶告於靈座儀 奉謚冊寶前一日其日奉謚冊寶  
太傅讀冊寶官舉冊寶官並常服守和寧門入詣祥曦殿門外幕次太常  
寺贊引人禮部職掌及援衛親從輦官等並於殿門外隨地排立以俟掌  
管進呈謚冊寶內侍請降謚冊寶出祥曦殿以授禮部於殿門上權置定  
次禮直官引太傅已下詣殿門下隨地立班再拜訖如值雨或霪濕免拜  
權側身立俟有司奉迎援衛等進行太傅以下後從都大主管官往來照  
管至謚冊寶幄次禮部職掌捧謚冊寶詣幄次權置定訖太傅退宿齋於  
都堂其餘行禮官並宿齋於本司捧冊寶職掌援衛祇應人並於冊寶幄  
次之側宿衛 奉上謚冊寶日 其日太傅讀冊寶官舉冊寶官並文武  
百僚並常服吉帶守和寧門入詣幕次換黑帶內太傅讀冊寶官舉冊官  
詣權安奉冊寶幄次有司捧冊寶出幄太傅已下步從至櫝殿下稍西東  
向褥位權置定冊北寶南太傅已下權退歸幕次俟有司排辦香火等畢  
備御史臺閣門太常寺分引文武百僚詣櫝殿下及殿門外隨地之宜立  
班定次禮直官引讀冊讀寶官詣冊寶案之後褥位東向立次引舉冊舉

寶官於讀冊讀寶官之後立次引太傅詣殿下西向立禮直官贊太傅躬  
拜在位官皆再拜訖次引太傅升殿詣大行皇后香案前措笏上香再上  
香三上香跪一酌茶三奠酒執笏俛伏興再拜訖降階復位少立次再引  
太傅詣殿下北向褥位俛伏跪奏稱太傅臣某言奉詔奉上大行皇后謚  
冊寶奏畢俛伏興退復位次引舉冊官詣冊案措笏跪舉冊匣興凡舉冊  
寶皆禮部職掌助舉職掌先捧冊案升詣殿上香案前置於褥位北向次  
舉冊官舉冊行次引太傅措笏捧冊升殿至褥位北向跪奠冊匣於案上  
太傅執笏興少退稍西褥位東向立次舉冊官執笏興少立次引讀冊官  
升殿詣冊案之後北向立舉冊官措笏跪舉冊次讀冊官措笏跪讀冊訖  
執笏興次引太傅及讀冊官俱降階復位立舉冊官奠於匣次舉冊匣興  
職掌先捧冊案於殿上稍東褥位置定舉冊官舉冊匣跪置於案上舉冊  
官執笏興降復位次引舉寶官措笏跪舉寶盃興職掌先捧寶案升詣殿  
上香案前置於褥位北向次舉寶官舉行次引太傅措笏捧寶升殿至褥  
位北向跪奠寶盃於案上太傅執笏興少退稍西褥位東向立次舉寶官  
執笏興少立次引讀寶官升殿詣寶案後北向立舉寶官措笏跪舉寶次  
讀寶官措笏跪讀寶訖執笏興次引太傅及讀寶官俱降復位立舉寶官

奠寶於盥興。次舉寶盃興。職掌先捧寶盃案於殿上。稍東褥位置定。舉寶官舉寶盃跪置於案上。舉寶官執笏興。降復位。禮直官贊太傅躬拜。在位官皆再拜訖。並退。時值雨。或霑濕立班官。并用寶及祇應人。並隨宜立班升降。歸幕次。易吉帶。詣後殿門外立班。進名奉慰訖退。鼓吹警場挽歌。

乾道三年七月九日。禮部太常寺言。將來大行皇后梓宮發引。并前夕依禮例。合用挽詞。唱和執色挽歌。并發引前夕沿路至攢宮陵所。並合排設警場鼓吹。修撰詞典。今檢照懿節皇后禮例。申請下項。一合用挽詞。係翰林學士中書舍人共撰二十首。一挽歌人數。今比附用三十六人。今乞勒挽歌節級踏逐會解唱和之人。拘收赴寺教習。一挽歌。合用服著青欄衣。油畫冠等。并執色鈴鐸事件。乞下文思院製造。一今來所撰挽詞。才候降下。依例合閱習一月。至期呈拽前夕。唱和及發引前導引至攢宮。至掩攢。一切了畢。放散。一依國朝故事。靈駕發引。合用導引六州十二時詞典。今乞依例具腔譜。申學士院修撰降下教習。一警場。合用金鈺十二人。鼓角手各六十八人。逐色教頭五人。管押人負三人。部押使臣一員。乞令殿前司就差金鼓鳴角。并合用武嚴指揮教頭三人。依例於太常寺見管人內差撥。一鼓吹。合用鼓吹令丞。職掌府典史引樂官一十

人。內除見管令丞外。依例差太常寺人吏充攝。歌色一十六人。箏篋色三十人。笛色三十人。簫色八人。大鼓一十六人。小鼓一十六人。節級一名。金鈺四人。共用一百二十一人。其所差鼓吹執色人。昨紹興十二年。係借差鈞容直。今乞依例於殿前馬步三司均差。會解樂藝識字之人充攝。事畢發遣。一所有警場鼓吹挽歌。欲乞定日。總護使頓遞使都大主管葬事所等官。并禮部太常寺官。按習。係與鍾鼓院金吾街仗司同日按習。乞於貢院詔依。挽詞。其一。上主周南化。真同麟趾詩。未符柔順德。有助太平基。種稂當年美。禕禩此日悲。六宮思婦則遺訓。有餘師。其二。帝遣皇英女。來濱虞汭門。鈞陳元自近。天極有常尊。寶冊彌文在。徽名古制敦。所嗟弓韞祝。曾不報姜嫄。其三。未植長生木。先開白柰花。風流綠繭館。腸斷濯龍車。蘭殿成陳迹。蓬壺有舊家。悠悠赤山道。煙月送悲笳。其四。淑德膺天眷。坤寧啟殿闈。未聞留玉璫。俄已掩金扉。禮意存椒壁。功勤見鞠衣。南山孤月在。澹澹不成輝。其五。儼極身方貴。乘雲質已僊。定從金母燕。不數月娥賢。彤管傳新史。清詩藹舊篇。豈知生是夢。惟有淚如川。其六。壁月循黃道。軒星映紫闈。六宮師儉節。八表詠音徽。翟茀前驅是。龍帷去路非。柏城無白日。揮淚掩容衣。其七。德配塗山氏。



人言夏后孫。二南風化盡。一旅典刑存。蘭殿秋聲早。椒房曉日昏。傷心五  
雲畔。悲憤攪乾坤。其八。漢漢乾坤大。寥寥族望雄。神謨夏后氏。隱德  
漢黃公。貴女開邦媛。徽音嗣國風。若爲天不弔。一旦玉繩空。其九。早  
預虞嬪降。親承代邸思。潛龍見真玉。瑜翟儼天闈。蘭殿音容盛。椒塗禮數  
尊。西風今夜月。忍自照黃昏。其十。儉德光千載。仁聲決四方。游龍戒  
車馬。吐鳳有文章。締綵猶朝御。房櫳漫夕香。猶堪付彤管。椽筆寫遺芳。  
其十一。不見朝黃道。猶疑閔紫闈。坤儀方厚載。月魄竟淪輝。玉座悲歡  
異。金輿寂寞歸。梁間雙燕語。似說故時非。其十二。穰穰都門道。遺儀  
感路人。龍輶成永訣。鷺鷥儼橫陳。西極僊游遠。南山吉兆新。蕭森柏城路。  
何日夜臺春。其十三。皇矣中天運。居然內治修。龍樓朝朔望。蘭館奉春  
秋。水殿人何在。雲軒輓莫留。西風湖上路。笳吹擁行輈。其十四。魚貫  
承恩日。鷄鳴問寢時。聖傳仍翰墨。能事更聲詩。共擬周南應。翻成楚些悲。  
昭文琴不鼓。那忍問成虧。其十五。玉勝題祥兆。璿衣媿至尊。柔儀高  
馬鄧。懿德邁娥嫫。鸞掖空陳迹。霓軒即異恩。傷心踰七夕。素柰不勝繁。  
其十六。圖史懷規鑒。篇章妙剪裁。承顏記金屋。委化忽泉臺。幽壤湖山  
秀。清笳道路哀。玉繩秋既望。猶話翟車來。其十七。鬱鬱南山路。空瞻

鳳翼紅。薤歌淒曉露。蘭殿慘秋風。故劍恩仍在。中璫事已空。祗應彤史筆。  
能爲記陰功。其十八。時節家人禮。從容父子歡。母儀天下順。婦道四  
方觀。玉冷衣銷鳳。塵昏鏡掩鸞。前春勸蠶事。無復上桑壇。其十九。傲  
戒言猶在。尊榮事已非。秋高天雨泣。僊去月沈輝。椽筆空遐想。椒塗定不  
歸。可堪聞卹典。華夏涕沾衣。其二十。儀天初作合。遡日自同休。身有  
憂勤志。家無恩澤侯。月方沉厚夜。春不返長秋。典策哀榮備。難紓萬國愁。  
鼓吹。黃鍾羽。導引。金殿晚愁結。坤寧天下母。忽僊昇雲山。浩浩  
歸何處。但聞空際綵鸞聲。紫簫斷後無蹤跡。煙靄靄。夜澄澄。曉夢到瑤城。  
當時花木正眞眞。六州。娟娟月初未闕。忽沉西。桂枝殘。寒兔下。惟見  
露脚斜飛。六宮歌笑奉瑤墀。一朝寂寞掩禕衣。夜星不動玉鸞嘶。沉沉何  
處。愁霧鎖金扉。群僊瞻道範。肅駕到蓬池。紫清逸轡。飛電奔馳。又誰知  
一世柔儀。椒塗玉鈿金螭。贊聖主。膺天命。功勤曾佐雍熙。三天隔玉闈。低  
迷。五雲高絳府。參差。往事如今好。尋思。留得香殘。鑊管寫新詩。但看芳猷  
美。寶冊傳徽。隆名萬古昭垂。十二時。皇家景運合無疆。天子坐明堂。  
豐年多黍。四方爭報時康。酒常清。花易好。壽君王。天公見玉女。大笑億千  
場。不知椒塗暗淡。瑤殿淒涼。寶鏡玉臺光。可柰畫眉人去。脂澤散餘芳。極

目望瀟湘。波遙草遠。只見殘陽。南山古阜。松柏茂蔚蒼蒼。香靄宮商。風過金玉琳琅。導歌繁嚴鼓近。慘悲傷。水凝愁。山橫恨。煙暗雲黃。神山河在。蟠桃已遠。若木何長。最難堪。回翟雉。逐鷺風。音容遠別。殿謾焚香。釋服乾道三年。六月二十六日。禮部太常寺言。今來皇后上僊。今參照顯恭皇后故事。皇帝成服。七日而釋。百官三日而釋。諸道州府訃告到日。長吏率文武官舉哀成服。三日而除。今欲乞依上件典故。詔依。二十八日。禮部太常寺言。今檢照典故下項。一建隆二年。六月二日。昭憲皇太后崩。太常禮院言。皇弟恭寧軍節度使。太宗舊名嘉州防禦使光美。並服齊衰三年。准故事。合隨皇帝以日易月之制。二十五日。釋服。二十七日而禫除畢。服吉服。心喪終制。從之。一景德元年。三月十五日。明德皇后崩。太常禮院言。准昭憲皇太后禮例。宗室雍王已下。禫除畢。吉服。心喪終制。從之。一今來大行皇后上僊。所有皇太子皇子。今欲比附上件典故。二十五日。釋服。二十七日而禫除。服吉服。心喪終制。詔依。七月一日。禮部太常寺言。今來大行皇后上僊。其七月八日。皇帝行釋服之禮。緣是日皇太子皇子所服未除。今欲乞俟將來皇太子皇子釋服并禫除日。詣大行皇后梓宮殿前行燒香之禮。詔依。二日。禮部太常寺言。將來皇帝為大行皇后

釋服日。依懿節皇后禮例。詣几筵前行祭奠之禮。今比附成服祭奠禮例下項。一合用祝文一首。述以為大行皇后釋服行祭奠之意。所有合用御香香案器皿。及設御幄。衾褥百官幕次。差前導讀祝文官侍香捲簾內侍官等。並乞依成服禮例。一釋服日。欲乞依禮例。皇帝自內服期服。詣大行皇后橫殿御幄。俟太常卿奏請訖。權易忌日之服。俟行禮畢。歸幄。易吉服還內。一應行事執事陪位官。赴大行皇后橫殿。依禮例。並合權易黑帶。去金玉飾并魚袋俟禮畢。仍舊吉帶。一行禮日。依禮例。文武百僚陪位立班。是日百司欲並作休務假一日。一昨懿節皇后上僊。皇帝釋服訖。其期服於利方焚燒。今來大行皇后上僊。皇帝釋服訖。其期服欲乞依典故。令太史局差剋擇官。指引利方焚燒。并差監視燒燎官一員。乞下入內內侍省差。合用柴草。乞下諸司排辦。詔依。釋服行禮儀。其日時前。禮直官太常博士太常卿先詣幄前立。俟皇帝自內服期服。詣大行皇后橫殿側御幄即坐。簾降。次禮直官太常博士引太常卿當幄前。俛伏。跪奏稱。太常卿臣某言。請皇帝為大行皇后釋服行祭奠之禮。奏訖。伏興。退復位立。俟皇帝釋期服。易忌日之服訖。御史臺閣門太常寺分引文武百僚。權易黑帶入詣殿門內外。隨宜立班定。俟禮直官先引讀祝文官。詣大

行皇后攢殿前香案之西東向立。閣門報班齊。在位官皆再拜訖。簾捲。禮直官太常博士太常卿前導皇帝出幄。由殿階詣大行皇后几筵香案前。奏請上香。再上香。三上香。內侍進茶酒。又奏請酌茶奠酒。再奠酒。三奠酒。奏請少立。讀祝文。官措笏東向跪。讀祝文訖。執笏興退。奏請皇帝舉哭。在位官皆舉哭。俟哭止。又奏請皇帝致欵不拜。前導官前導皇帝。在位官皆再拜訖。俟皇帝歸幄。次文武百僚前導官退。皇帝就幄。易吉服。還內。次文武百僚易吉帶。詣後殿門外。進名奉慰訖。退。啓攢。乾道三年七月六日。禮部太常寺言。將來大行皇后發引。行啓攢。啓奠祖奠。遣奠之禮。今檢照典故。申請下項。一。乾德二年三月二十七日。孝明皇后攢宮。群臣服初喪之服。臨于庭。二十八日。神柩自滋德殿發引。帝於明德門外素服設幄。行遣奠之禮。一。至道元年十月二十一日。太常禮院言。十一月一日。孝章皇后啓攢宮。二十九日。太常禮院言。上自啓攢。至遣奠。遂祭儀注。詔啓攢宮。啓殿祖遣四祭。並遣監護使郭贄攝太尉祭。一。景德四年五月二十九日。章穆皇后啓攢宮。帝親臨酌奠。六月八日發引。帝素服行遣奠之禮。一。懿節皇后梓宮發引。當時與顯肅皇后同時發引。其日皇帝親行啓奠祖奠遣奠之禮。一。顯仁皇后梓宮啓攢。總護使先行奏告禮畢。

皇帝親行啓攢祭奠之禮。十六日靈駕發引。皇帝親行啓奠祖奠遣奠之禮。一。檢照前項啓攢等典禮。並皆不同。所有將來梓宮啓攢日。今欲參照已行殿攢禮例。俟啓攢時前。令總護使先行祭告禮畢。有司捧遷梓宮。還殿安奉訖。皇帝行啓攢祭奠之禮。其啓奠祖奠二祭。欲乞令總護使行禮。及俟梓宮發引。皇帝行遣奠之禮。詔依宋會要九日。左右金吾街仗司言。將來大行皇后發引。嚴更做場。令差押當官一員。職掌二人。兵八十八人。前期教習唱和警場從之。十五日。禮部太常寺言。將來梓宮啓攢訖。皇帝行啓攢燒香禮。合行事件。一。啓攢皇帝服素。行燒香之禮。群臣以初喪服。自是日一臨。至發引皆如之。乞用昨發哀入臨。官立班。并發引前一日晝漏未盡三刻入臨。合差定時剋擇官。乞就差都大所剋擇官。一。啓攢所有陪位立班官。今參照殿攢禮例。於殿庭立班。官易初喪之服陪位。其班于殿門外。官更不入陪位。止令常服黑帶。以俟奉慰畢退。及內庭諸色人。只服本色服。一。依禮例。自啓攢前三日至祔廟。並前殿不坐。仍自啓攢至發引前後殿不視事。宰執除啓攢日并發引前一日外。餘日赴內殿奏事。一。依禮例。啓攢畢。合行奉慰。今乞俟啓攢行禮畢。文武百僚並詣後殿門外。進名奉慰。是日百司作休務假一日。一。今來合於攢殿東廊。



其日俟排辦足備。引總護使常服黑帶。詣大行皇后梓宮香案前北向再拜訖。搢笏。三上香。三奠茶。三奠酒。訖。執笏。俛伏興。少立。讀祝文。官東向跪。讀祝文。訖。總護使再拜訖。俱退。皇帝行啓攢儀。其日文武百官常服吉帶入皇城門幕次。合赴殿庭陪位。官就次。易初喪之服。以俟陪位。其班于殿門外。官就次。易常服黑帶。以俟奉慰。俟啓攢訖。御史臺閣門太常寺分引行事陪位官。又詣攢殿下就位立班定。讀祝文。官於香案之西東向立。前導太常卿太常博士禮直官立於御幄之前。皇帝自內服常服至幄次。服素服白羅軟脚幞頭白羅衫黑銀帶絲鞋。即座。閣門報班齊。禮直官太常博士引太常卿當幄前俛伏跪奏。太常卿臣某言。請皇帝爲大行皇后啓攢還殿行燒香之禮。奏訖。伏興。退復位。在位官皆再拜訖。簾捲。前導官導皇帝出幄。詣梓宮香案前上香。再上香。三上香。內侍進茶酒。又奏請奠茶。奠酒。再奠酒。三奠酒。奏請少立。讀祝文。官東向跪。讀祝文。訖。又奏請舉哭。皇帝舉哭。在位官皆舉哭。俟哭止。又奏請致欽。不拜。前導皇帝。在位官皆再拜。皇帝歸幄。簾降。陪位前導官退歸幕次。換常服黑帶。以俟與侍班奉慰。文武官並詣後殿門外進名奉慰。訖。並就次。易吉帶退。

永樂大典卷之七千三百七十八

永樂大典卷之七千三百七十九

十八陽

喪

喪禮三十九

中興禮書發引 乾道三年七月二十日禮部太常寺言今未大行皇后  
上僊今續次討論到章穆皇后故事發引日皇帝服素服親行遣奠改常  
服還內群臣服初喪服不會葬者城外奉辭訖改常服奉慰會葬者俟掩  
皇堂畢改常服所有將來發引日欲乞並依前項禮例內皇帝行遣奠禮  
所服素服欲乞至日服白羅軟脚幞頭白羅衫黑銀帶絲鞋令文思院製  
造御藥院送納詔依同日又言今檢會章穆皇后園陵故事係差五使昨  
來昭慈聖獻皇后攢宮顯仁皇后攢宮並止差總護使橋道頓遞使今來  
大行皇后攢宮差官合取朝廷指揮詔總護使差居廣頓遞使差史正志  
四日御史臺言將來梓宮發引其日文臣百官合排設路祭一座所有合  
用真衣絲贈冥器花果香燭齋供道場等其所用錢乞令應文臣至選人  
並照本身合得料錢每貫納錢三十文省欲乞依昨顯仁皇后梓宮發引  
例於臨安府送納出給朱鈔將所收到錢乞令臨安府委官排辦路祭等

支使候事畢日具所收并支使過錢物報本臺照會。或有支費不盡錢數令臨安府一面繳納左藏庫。詔依。同日工部言禮部尚書周執羔等劄子。今來皇后上僊。今檢照禮例。發引日。合用大昇輦并龍輜。大昇輦合用牌一面。朱漆青地金字。係製造官司委官書寫謚號。皇后大昇輦七字爲文。及合用哀冊并沿冊法物。欲乞並令工部下文思院修製。仍乞令本院依昨懿節皇后并安穆皇后謚冊寶等體例。赴太常寺看詳訖。下院製造。奉聖旨依尋下將作監施行。據文思院上下界申。今來修製哀謚冊寶。并大昇輦龍輜車等法物。雖已降指揮。令逐院彩畫圖本齋赴太常寺看詳。下院製造。竊慮所畫名件與制度內有聲說不盡去處。若再申本寺。委是往復遲誤。今欲乞下太常寺專差詣知次第禮直官一名赴院。及作頭不妨本役往來赴院指說樣制色額。造作施行。庶合典禮。詔依。大昇輦床裏明長一丈二寸。兩面匙頭各長八寸。計一尺六寸。通長一丈一尺八寸。床程垂面闊七寸。床程厚五寸。床脚高五寸。并床程共高一尺二寸。床程外闊五尺八寸。其床上隨程兩邊空二寸。其餘用貼板。大昇輦四角柱四條。各通長七尺二寸。各上安各杆子德木全。大昇輦床脚於床程上第一光裏過半外。外上面造殿子頭與大昇輦相稱。造作未見得高低。兩壁上木板

雕青龍白虎。并各有龍虎神童子事件意帶全。前後安朱紅毳路。開閉隔子門二扇。鑲鑰立坊全。於門立坊上。前有雕木朱雀。後有雕木玄武。兩壁錦幘。前後乾紅。緣簾量大昇輦高低闊狹造作。緋錦軟索條八條。前後木力士一十四箇。量大昇輦角柱德木高低造作。各抹綠桐油蓮花整坊木四箇。故大昇輦四角床脚下使用。各用鐵手把全。上有大杆二條。外杆二條。鴈翅杆二條。牛頭杆二條。各雕造螭頭。并大橫抹竿二條。已上並用刷白畫雲鶴。桐油內龍輜車程裏明。長一丈一尺二寸。兩面匙頭各長七寸。計一尺四寸。通長一丈二尺六寸。床程縵外闊六尺。兩邊把頭長九尺。垂面八寸。各厚三寸。四脚各高二尺五寸。軸長九尺。兩面輜子隨車拽脚縵勢造作。板底用貼抹子。龍輜車兩邊遠拘欄子高一尺二寸。脫卸造。作其拘欄子朱紅漆造。壓元杆子二條。兩頭直經各五寸。杆身立厚六寸。床程厚四寸。垂面闊八寸。兩面把頭木厚三寸。並刷白彩畫雲鳳。四脚各畫蓮花。及用桐油造。同日禮部尚書周執羔等言。今來大行皇后上僊。依禮例。合差撰哀冊文官一員。書哀冊文官一員。伏乞朝廷差官施行。詔撰哀冊文官差王曠。書哀冊文官差梁克家。同日禮部太常寺言。今參酌禮例。條具下項。一依懿節皇后禮例。太傅持節導梓宮。合用節一副。及合用

贈玉匣床一副。鑱匙複帕全。並乞依例下工部。令文思院製造。一依國朝會要。園陵故事。發引日。合用鹵簿儀仗。緣即日未備。權以儀衛服紫衫。執持本殿儀物。令主管禁衛所前相度差撥。所有將來大行皇后發引日。欲乞依前項故事施行。一所有哀冊。欲乞依禮例。俟有司修製畢。依舊文思院收掌。俟發引前一日。禮部設於行宮門外。冊寶幄次。俟發引日。行遣奠禮。讀哀冊訖。陳列哀冊於大昇輦之前。影殿之後。導引至攢宮日。交割赴攢宮都監收掌。俟將來遷奉園陵。即依故事入皇堂安設。一謚冊寶依禮例。發引前一日。本殿降出付禮部。設於行宮門外。冊寶幄次。俟發引日。行遣奠禮。訖。陳列於大昇輦前。哀冊之後。導引至攢宮於幄次安設。俟掩攢宮畢。却以謚冊寶導引虞主回日。謚冊寶依舊交付本殿官。俟導引虞主至太廟。其謚冊寶交割付太廟奉安所收掌。詔依。十二日。太常寺言。准尚書省劄子。大行皇后喪事。都大主管所狀。今來梓宮攢殯去處。已承指揮。就安穆皇后攢宮。所有將來梓宮發引。合選定利方。經由道路門戶。下所屬討論。奉聖旨。依太史局申。將來梓宮發引。合出本殿門頭。北出北宮門。至和寧門外。係是歲空方。至都亭驛新路頭。東向。南出嘉會門。已次委曲經大路。轉至赤山路口頭。東至安穆皇后攢宮。依得陰陽經書。

即與國音別無妨礙。太常寺今討論。欲依太史局所申事理。其道路乞令橋道頓遞使司措置。詔依。十三日。禮部太常寺言。將來大行皇后奉謚冊寶。并梓宮發引。皇帝親行遣奠之禮。依禮例。合差太傅一員。後從。係差宰臣。詔依。十五日。禮部太常寺言。將來梓宮啓攢訖。今具啓奠等。合行事件。一。行啓奠祖奠遣奠之禮。共合用牙床三張。乞令工部下文思院製造。一。發引合用黝三匹。以熟皂絹充。纁二匹。以熟緋絹充。令太府寺下左藏庫支供。詔依。十六日。禮部太常寺言。將來皇帝親行遣奠禮。總護使行啓奠祖奠禮。今條具。合行事件。一。依禮例。發引日。百官於城外奉辭。依故事。並服孝服。所有自成服後。其文武官至行在者。不當別造孝服。止合公服。黑帶立班。今未發引奉辭日。今欲並依上件故事施行。一。發引日。皇帝親行遣奠之禮。合差贊導太常卿一員。贊引太常卿太常博士一員。乞差太常寺官。合差捲簾侍香捧帶爵酌酒捧盤。匣悅中拭爵中。監焚燎等內侍。乞下入內侍省差。一。擡擊哀冊。輦官。及禮部職掌。各乞下所屬差撥。一。親行遣奠之禮。依儀皇帝詣梓宮前。上香不跪。致欵不拜。所有奠幣奠酒。欲奠於香案上。其奠酒依殿攢例。就香案上設奠酒。孟子所有合用幄次。欲乞於和寧門東壁待漏院。令儀鸞司排辦。一。啓奠祖



奠遣奠行禮。依儀並合用牲牢禮料。實籩豆簋。設於牙床。係太常寺排辦外。所有大行皇后梓宮前。合設香案麻爐奠酒。孟子乞從本殿排辦。

一梓宮前。竊慮有鋪設供養花版果壘等有妨。將來安設牙床行禮。欲乞從都大主管所下本殿。於至日時前徹去。一行遣奠之禮。合差讀哀冊。

官一負。舉冊官二負。進幣爵酒官一負。酌酒官一負。伏乞朝廷降勅差官。一總護使行啓奠祖奠禮。合差奉禮郎太祝太官令各一負。欲乞輪差。

太常寺官詔依。同日。又將來大行皇后梓宮發引。今條具下項。一依禮例梓宮升大昇輦內侍封鑰。檢會昨顯仁皇后靈駕發引。赴攢宮日。不

曾封鑰。今來梓宮升大昇輦發引日。欲依禮例。更不封鑰。一行遣奠禮。欲乞依禮例。太傅親王總護使及行事侍中等南班諸親陪位。內諸親係

大行皇后本宅親屬。一啓奠祖奠。合用祝文二首。一首述以總護使行啓奠之意。一首述以總護使行祖奠之意。乞下學士院修撰。一合用御封

降真香三合。乞下入內侍省請降。一啓奠祖奠遣奠行禮。合用幣帛三段。各長一丈八尺。令戶部下左藏庫支供。及合用羊豕各三副。羊豕各

一。乞下臨安府收買。其合用禮料酒齊等。乞具合用數報臨安府排辦。內啓奠祖奠交割付本殿。及差殿內幕士等擡擊鋪設事畢。擡出。一合用

盥洗盤匱并巾。乞下文思院製造。一昨懿節皇后梓宮發引前一日。奏

告行在宮觀。及祭告經過十里內祠廟。內宮觀乞申請差官行禮。其經過

祠廟。令臨安府隨宜差官。備酒脯幣帛。修寫祝文行禮。今來梓宮發引前

一日。欲乞依前項禮例施行。一依禮例梓宮發引前一日。總護使行夜

祭之禮。俟行禮畢退。其挽歌初更入殿。祇應。至初更後。並令出殿。今來梓

宮發引前一日。欲乞依禮例施行。其合用燈燭。并供養食茶酒果香等。乞

令諸司排辦。其祝文下太史局排辦。一依禮例梓宮發引前一日。呈拽

按視車輦方相大昇輦。并一行儀衛僧道等。從總護使同都大主管按視

一發引日行遣奠禮畢。除總護使并都大主管官合隨從外。其餘行事侍中已下陪位訖。並乞依故事先赴攢宮內隨從。官吏等沿路若值雨許

施雨具。一發引日。其親王南班宗室。并本宅諸親。俟行遣奠陪位訖。後

從梓宮升大昇輦至攢宮。俟掩攢宮畢。奉辭訖退。一發引并掩攢係同

日。乞行一就祭告安穆皇后攢宮。其祭告官乞依例。係總護使司行下大

宗正司。差南班宗室一負。前一日赴攢宮致齋。所有合用御封香祝文。乞

依例關報所屬請降。合差太祝一負。并合用供養茶酒果等。乞報臨安府

差官。及依自來祭告禮例排辦。一發引日沿路等。合用御封降真香。具

數報入內侍省請降。一橫宮合用梓宮待時幄次。乞下頌遞使司行下所屬相度釘設。所有方位。乞令都大所剋擇官指引利方。一依禮例。將來掩橫宮日。總護使率應在橫宮官進表奉慰。詔依。十七日。禮部太常寺言。梓宮發引至橫宮。今條具下項。一發引日。其方相買道輿等。除絲結物色外。其餘大昇輦方相買道輿等。候至橫宮日。依故事合於橫宮外焚燒。所有焚燒方位。乞下都大主管所就差本所剋擇官指引方位。一大行皇后重候至橫宮日。即乞隨方相等於利方焚燒。所有銘旌黹纁贈玉。乞依例隨梓宮於神穴內安設。詔依。二十七日。禮部太常寺言。梓宮發引。合差侍中一員。奏請梓宮升降進發權駐。太傅一員。持節導梓宮。監掩橫宮。少傅一員。率捧梓宮官奉升大昇輦。并攝少保復土九鍾。太常少卿一員。率執翼障梓宮。監察御史一員。監掩橫宮。少府監一員。進龍輜。將作監一員。捧梓宮登龍輜。兼掩橫宮。贊引太傅持節導梓宮。太常博士一員。伏乞降勅差官。詔依。二十九日。禮部太常寺言。將來梓宮發引。已降指揮。前一日。奏告行在宮觀。所有合用御封降真香一十四合。青詞二首。祝文一首。並述以安恭皇后梓宮發引前一日。奏告之意。蒼幣四段。白幣一十段。各長一丈八尺。并合用禮料酒燭。及差奉禮郎以下行事官等。

並乞令太常寺依自来奏告禮例。關報所屬差官排辦。其合差奏告官。乞降勅差。詔依。閏七月三日。禮部太常寺言。梓宮發引。今比附條具下項。一梓宮發引行遣奠禮。皇帝所服。欲乞依啓橫禮例。供進忌日之服。其後從太傅并應奉前導等官。並常服黑帶。一梓宮發引行遣奠禮。依已降指揮。是日皇帝出祥曦殿乘輦。詣和寧門外幄次。俟梓宮升大昇輦。訖行遣奠禮。其所設幄次於和寧門裏東壁。隨地絞縛。及合用露屋。並令儀鸞司同臨安府排辦。今欲乞是日。皇帝自內服常服。出苑西便門。詣幄易忌日之服。以俟行遣奠禮畢。歸幄釋忌日之服。服常服還內。所有合用禁衛等。乞令禁衛所相度施行。所有大昇輦欲乞於和寧門外近門安設。以俟梓宮降龍輜升大昇輦。安卓訖。行遣奠禮畢。次用杆杖絞縛捧擎進發。詔依。四日。禮部太常寺言。梓宮發引掩橫宮。今參酌到合行事件下項。一發引日。文武百僚赴嘉會門外奉辭訖。赴後殿門外進名奉慰。并是日掩橫時。文武百僚亦合詣後殿門外奉慰。契勘今來同日兩次奉慰。委是繁數。今欲乞文武百僚於嘉會門外奉辭訖。候掩橫時至。文武百僚詣後殿門外。一就進名奉慰。一發引日。南宮門并麗正門。並依時開門。緣是日梓宮發引。太傅已下後從等行禮畢。內有合赴嘉會門外奉辭立班官。

緣至日梓宮已進發難以前路攬越欲乞至日梓宮發引行禮畢換常服  
吉帶入和寧門出麗正門赴嘉會門外易衰服奉辭今欲乞是日南宮門  
并麗正門比常日早三刻開放令太傅以下後從等趨赴奉辭詔依 哀  
問文 維乾道三年歲次丁亥六月丁卯朔二十五日辛卯安恭皇后崩  
于坤寧殿七月壬寅殯于殿之東南隅粵閏七月癸酉遷座于菽宮禮也  
東渚星高西陵月下縞紼前馳雕輶肅駕動永愴於終天隔徽音於厚夜  
皇帝情深邦媛禮重長秋問靈宮之既啓嗟總帳之將收乃即賓階是臨  
遣奠爰命辭臣奉揚芳憲辭曰惟昔有妣功被萬世席慶流光發祥隲祉  
珠躔炳靈瑤魄降瑞際于休明生此淑懿韞輝素里育德仁門淑問不已  
德儀攸尊恩于克母慧心彰聞見于內殿柔風益芬軒象應符蘭閨鍾粹  
代邸膺歷重華協帝黃龍絢采紫宮正位體極坤元尊如天妹內輔陰教  
旁裨政機訓組致力璵珩有儀覃葛播美睢鳩在詩家道以正王化之基  
絲枲是飭種稷是共頻御蘭館希從濯龍喜不失節怒不變容惠有卹隱  
恩無濫封處約戒奢懷沖履素服練斥華脫簪知度領畧風雅披拂韶濩  
辯有微言詩多奇句貴則儼極尊惟承天既備五福宜膺百年忽六氣之  
淫厲嗟二童之夢言顧甚迫之短景曾不留於逝川嗚呼哀哉龜策告猷

龍輶御轍雲物結而淒淒蕭鼓合而攢咽路隱隱兮迴重阜旌冉冉兮背  
雙闕祔玉衣兮何之望珠櫺兮遠訣嗚呼哀哉美蓮娟兮撫宮楹包紅顏  
兮隕朱榮指新宮兮離故庭去昭昭兮就冥冥華殿塵兮神眇眇花欄萋  
兮草青青屑兮不見超兮西征嗚呼哀哉遺組香兮猶穠故鞠蛛兮未封  
寶瑟委兮弦斷玉臺移兮鏡匿空象服具兮疑曉房櫳虛兮多風波浪  
深兮雌劍竟去水霜苦兮別鶴無蹤嗚呼哀哉半波絕源中春掩媚天理  
莫知人心是瘁雖但化之有終亶垂芳之長在惟德行之可傳塞天淵而  
不昧嗚呼哀哉 總護使行啓奠祖奠儀 其日有司設牙床牲牢禮饌  
訖啓奠時前引奉禮郎詣殿上西向立太祝詣殿上東向立太官令於酒  
罇所後北向立太史局報時前二刻禮直官引總護使詣殿下褥位西向  
立禮直官揖躬拜訖詣盥洗位盥手悅手詣爵洗位洗爵拭爵升殿詣梓  
宮前酒罇所西向跪執爵俟太官令酌酒訖興詣梓宮前跪上香再上香  
三上香奉禮郎奉幣總護使受幣奠幣執爵三祭酒奠爵俛伏興少立太  
祝跪讀祝文訖興總護使再拜訖降階復位立禮直官揖躬拜訖退俟有  
司徹牙床訖祖奠時至禮直官引侍中詣梓宮前俛伏跪奏稱侍中臣某  
言請安恭皇后梓宮進發奏訖俛伏興退復位凡侍中奏請皆俛伏跪奏

訖。伏興。俟輦官捧梓宮稍前。侍中又奏請梓宮少駐。奏訖。權退歸次。俟梓宮權置定。有司設牙床。牲牢禮饌畢。以俟總護使行祖奠禮。並如啓奠之儀畢退。皇帝親行遣奠儀。其日。皇帝於發引時前一刻。服常服出祥曦殿乘輦。禁衛如常儀。詣和寧門外。幄次。降輦入幄。簾降。易素服。即御座。訖。次前導官等立於御幄前。次禮直官引侍中奏請安恭皇后梓宮進發。初總護使行祖奠之禮。少府監帥其屬進龍輜於別殿門外。太傅持節導梓宮進發。降殿。太常少卿帥執翼者。分左右障梓宮。親王總護使等。并南班及諸親先於別殿門外立。以俟舉哭。後從次引侍中詣梓宮前。奏稱。侍中臣某言。請安恭皇后梓宮升龍輜。奏訖。退。次將作監捧梓宮升龍輜。至和寧門外。侍中奏請梓宮權駐。升大昇輦。少傅率梓宮官。係將作監奉梓宮升大昇輦。訖。有司設哀冊牙床。實牲牢禮饌畢。次引讀哀冊官。各就位。西向立。進幣爵酒官東向立。酌酒官於酒罇之後立。次引太傅親王總護使等。南班諸親。并行事侍中等。詣梓宮前。南向立。次禮直官太常博士引太常卿當幄前。俛伏跪。奏稱。太常卿臣某言。請皇帝行遣奠之禮。奏訖。俛伏興。退。復位。簾捲。前導皇帝出幄。詣大昇輦之東。稱位。西向立。次引太傅後從。奏請皇帝舉哭。不拜。在位官皆舉哭。再拜。次內侍進盤匱沃水。奏請

皇帝盥手。內侍進中。奏請皇帝悅手。內侍進爵。奏請皇帝洗爵。內侍進中。奏請皇帝拭爵。前導官前導皇帝。詣安恭皇后大昇輦香案前。又奏請皇帝上香。再上香。三上香。進幣爵酒官東向跪。先進幣。次進爵酒。又奏請皇帝受幣。奠幣執爵。三祭酒。奠爵。並於香案上。又奏請皇帝少立。哭止。次舉冊官跪舉冊。讀哀冊。官西向跪。讀哀冊。訖。又奏請皇帝舉哭。不拜。在位官皆舉哭。再拜。前導官前導皇帝歸幄。並哭止。太傅已下。并前導官並退。內合赴橫官者。赴橫官。次禮直官引侍中奏請梓宮進發。有司率僧道各執威儀鑼鈸道具。并應奉車輦法物及儀衛執持儀物人。前引梓宮進發。皇帝易常服還內。如來儀。奉辭儀。其日。百官先赴城外幕次。易初喪之服。俟安恭皇后梓宮將至。有司設香案。定御史臺閣門。太常寺集百官立定。禮直官引班首已下。詣班前立定。俟梓宮至。禮直官贊躬拜。在位官皆再拜。次引班首詣香案前上香。再上香。三上香。復位立。班首舉哭。在位官皆舉哭。俟哭止。禮直官贊躬拜。在位官皆再拜。奉辭訖。權退立。俟大昇輦過。並退。易吉帶。入麗正門。至後殿門外幕次。易常服黑帶。進名奉慰訖。易吉帶。退出和寧門。所有將來奉迎。至日。百官並常服黑帶。班首播笏。上香如上儀。唯不舉哭奉慰。宋會要。閏七月八日。梓宮進發。百官常服黑

帶奉辭於城外。是日申時掩攢宮。百官常服赴後殿門進名奉慰。總護使率應在攢宮官進表奉慰。梓宮進發。親王宗室本宅親屬並隨從。餘行事官侍中已下。並俟遣奠陪位訖。先赴攢宮梓宮至攢宮并掩攢。各前一日合奏告於安穆攢宮以發引掩攢同日。乃一就奏告。掩攢。乾道三年七月十七日。禮部太常寺言。今來大行皇后梓宮發引。至攢宮行遷奠并掩攢宮。今參酌合行事件下項。一遷奠行禮官。依禮例差總護使。一掩攢宮行禮官。依禮例差太常卿。一遷奠并掩攢宮各合差奉禮郎太祝太官令各一員。並乞輪太常寺官。如職事相妨乞報臨安府差官。一合用祝文二首。一首述以遷奠之意。一首述以掩攢宮之意。御封降真香二合。一遷奠并掩攢宮各合用禮料酒齊羊豕等。報臨安府排辦。一合用白幣二段。各長一丈八尺。一合用香爐。匙合。炭火。燎草等。乞下諸司排辦。一依禮例。梓宮到攢宮捧梓宮升獻殿權安奉。以俟遷奠掩攢宮。一將來掩攢宮時。欲乞依禮例。文武百僚常服黑帶於後殿門外進名奉慰。所有掩攢宮定時剋擇官。下太史局差。詔依遷奠掩攢宮儀。用閏七月八日。其日。俟大昇輦至攢宮。侍中詣大昇輦前俛伏跪奏稱。侍中臣某言。請梓宮降輦升龍輜詣獻殿。奏訖。俛伏興。有司捧梓宮升龍輜入獻殿。

訖。俟掩攢時前行遷奠禮。有司於梓宮前陳設祭器實牲牢禮料畢。先引陪位官立定。次奉禮郎已下入就位立。次引總護使詣梓宮殿下立定。並服孝服。禮直官贊躬拜。總護使再拜。在位官皆再拜訖。次引奉禮郎太祝太官令各升就位立定。次引總護使詣盥洗位。盥手。悅手訖。詣爵洗位。洗爵。拭爵。詣酒樽所跪。執爵。俟太官令酌酒訖。興。詣梓宮前跪。上香。再上香。三上香。奉禮郎奉幣總護使受幣奠幣。執爵三祭酒奠爵。俛伏興。少立。俟太祝跪讀祝文訖。總護使再拜訖。降階復位立。又再拜。在位官皆再拜訖。次引總護使詣望座位立。奉禮郎太祝太官令重行立定。有司瘞祝幣訖。退陪位官以次退。俟掩攢宮時至。用申時八刻後庚時。引侍中詣梓宮前俛伏跪奏稱。侍中臣某言。請梓宮赴攢宮奏訖。俛伏興。有司捧遷梓宮赴攢宮畢。次太傅少傅監察御史將作監并監掩攢宮訖。次引少傅復土九鋪太史招神靈工神帛。奉辭并掩攢畢行饗禮儀。掩攢畢。禮直官引總護使并行事官本司官屬詣安恭皇后攢宮再拜奉辭訖。初招神靈工神帛訖。次有司排辦牲牢禮饌訖。禮直官常服黑帶引奉禮郎太祝太官令立定。引太常卿詣攢宮殿下立。禮直官贊躬拜。太常卿拜。奉禮郎以下皆再拜訖。奉禮郎以下升就位。引太常卿詣盥洗位。搯笏盥手。悅手。洗爵。拭

爵執笏升詣樽所。搢笏跪執爵。俟太官令酌酒訖。執笏興。詣攢宮殿上搢笏跪。上香。再上香。三上香。受幣奠幣。執爵三祭。酒奠爵執笏。俛伏興。少立。俟太祝讀祝文訖。請再拜訖。降復位。禮直官贊躬拜。在位官皆再拜訖。引詣望座。位南向立。奉禮郎太祝太官令。重行俟焚瘞祝幣訖。次內謁者詣虞主。幄次內浴。虞主訖。以白羅巾拭訖。內謁者捧虞主升腰輿。次捧腰輿。官扶夾侍官。以次捧虞主腰輿。升攢宮獻殿穴。上南向。權置定。次引扶夾侍。啓匱訖。內謁者北向。俛伏跪奏稱。內謁者臣某言。請安恭皇后神靈。上虞主奏訖。俛伏興。少頃。內謁者再詣腰輿前。俛伏跪奏稱。內謁者臣某言。請安恭皇后虞主降輿升座。內謁者捧遷虞主即座。以青羅巾蓋之。腰輿退。以俟行虞祭之禮。御容。乾道三年七月十七日。禮部太常寺言。將來大行皇后梓宮至攢宮掩攢畢。下宮安奉御容。乞依禮例。差太常少卿行奉安燒香之禮。合用御封香一合。乞令入內侍省請降。其供養牙盤食茶酒果器皿香案香爐匙合奠茶酒鈔鑪盆臺拜席褥等。並下臨安府排辦。詔依。閏七月十一日。龍圖天章寶文顯謨徽猷敷文閣奏。近承降到安恭皇后御容二軸。赴閣。一軸內中神御殿崇奉。一軸本閣神御殿收奉。本閣已於幄殿內權行安奉外。今據禮直官開具到合行事件。一收奉并

安奉安恭皇后御容。依見今別廟室次序。係於安穆皇后之次。今欲乞就安奉日於時前捧遷。見安奉神御趨那稍北安奉安恭皇后御容。本閣官行燒香禮已後。並依祖宗諸后例崇奉。一合用御封香三合。乞依本閣例於睿思殿外庫請降。一合奏告本閣祖宗神御。并收奉。一合奏告內中祖宗神御并安奉。一合告遷安恭皇后御容。一告遷時前。本閣官常服吉帶詣神御殿。并詣內中神御殿行燒香。奏告禮畢。俟時告遷安奉行燒香之禮。一依禮例。合差援衛親從官五十人。肩擎輦官三十二人。自本閣捧擎腰輿至祥曦殿門。其自殿門捧擎腰輿至神御殿。乞差供內儀鸞司一十六人。就用本處服色。一乞下太史局選迎奉安奉吉日時刻。及至日時前告遷安恭皇后御容時。并差剋擇官一名。詔依。安奉御容儀。有司排辦供養食酒果等備。次太常寺少卿常服黑帶。禮直官引詣安恭皇后下宮殿下東向立。次有司捧遷安恭皇后御容。正安奉訖。禮直官贊太常少卿躬拜。次引太常少卿升詣安恭皇后御容香案前。搢笏。上香。再上香。三上香。跪奠茶。三奠酒訖。執笏俛伏興。請再拜訖。降復位。禮直官贊太常少卿再拜訖。次易吉帶詣安恭皇后攢宮。并下宮朝拜訖退。虞祭。乾道三年七月六日。禮部太常寺言。今來大行皇后上僊。依故事。虞主回

合用翟車。緣爲儀仗未備。止就用已造虞主腰輿。差輦官自攢宮捧擊虞主赴本殿。今來虞主回日。欲乞依禮例施行。其輦官令御輦院計會主管諸司差撥。詔依。二十一日。禮部太常寺言。今來大行皇后梓宮發引。掩攢畢。行九虞卒哭祭。檢照禮例。掩皇堂畢。陵下設第一虞奉主回。通行九虞及卒哭祭畢。擇日祔廟。今參酌條具事件下項。一依禮例。掩攢畢。迎奉虞主回。詣几筵殿。權安奉。以俟行虞祭及卒哭祭。所有几筵殿。欲乞就梓宮攢殿作几筵殿。一依禮例。掩攢畢。行第一虞祭畢。就攢宮獻殿。權安奉虞主。至次日早行第二虞祭畢。迎奉虞主回几筵殿。權安奉。一掩攢畢。虞主回。合於几筵殿。權安奉。係本殿官照管。以俟祔廟。所有香爐。匙合。炭火等。乞令本殿排辦。及帷次。乞下儀鸞司釘設。一虞主回。詣几筵殿。權安奉。訖。皇帝行安神燒香禮畢。次太常卿以酒脯行安神禮。合差前導太常卿太常博士奉禮郎太祝太官令各一員。並乞輪太常寺官。其行禮太常卿乞降勅差官。所有酒脯等。欲乞依自来祝祭禮例排辦。一合差內謁者一員。浴虞主。并奏請神靈上虞主。并合差捧腰輿內侍四員。扶侍夾侍各二員。兼安奉虞主祗應。及掩攢畢。行九虞卒哭祭及虞主回沿路及本殿。合差內侍官一員。幹辦守宿照管。并行禮捧遷虞主。並乞下入

內內侍省差官。仍乞差皇城司親事官八人。并管押一人。沿路守宿祗應禮畢發遣。一安奉虞主於攢宮獻殿行虞祭禮。合用倚卓一副。搭席等令臨安府計會主管諸司排辦。一九虞祭畢。祔廟前行卒哭祭。合差行禮官一員。依禮例乞差南班宗室正任以上充。一行九虞祭。并卒哭祭。各差奉禮郎太祝太官令各一員。並乞輪請太常寺官。一九虞并卒哭祭。并皇帝行安神燒香禮。并太常卿行安神禮。共合用御封降真香一十二合。一九虞祭。合用祝文九首。並述以大行皇后掩攢官畢。遣官行九虞祭之意。并卒哭祭祝文一首。述以爲大行皇后神主祔廟前。遣官行卒哭祭之意。及太常卿行安神禮祝文一首。述以迎奉大行皇后虞主回。詣几筵殿。遣官行安神禮之意。並乞令學士院修撰。一九虞并卒哭祭。及太常卿行安神禮。共合用白幣一十一段。各長一丈八尺。一九虞并卒哭祭。各合用羊豕各一口。乞下臨安府收買。并饌造神食御厨工匠。乞下御厨差撥。一將來立虞主并神主祔廟。所有浴虞主神主。各合用檀沉箋。茆香末各半兩。柴二十五斤。下臨安府排辦。一行禮日。合用香爐匙合。上香木炭燈燭燎草。並乞令神主祔廟都大主管所下所屬排辦。內燎草。乞令主管諸司一面報皇城司照會放入。其幣帛祝文。乞依例俟行禮畢。

交割付几筵殿官一面焚燒。一卒哭祭行禮日。依禮例皇帝不視事。俟几筵前行禮畢。文武百僚詣後殿門外進名奉慰。一奉迎虞主回几筵殿。皇帝行安神燒香禮。合設御幄施簾。乞下儀鸞司釘設并排辦。黃羅襪褥。奏請紫褥。一自攢官捧擎虞主腰輿回赴本殿。合用綵結殿子。乞下儀鸞司絞縛。及輦官乞下御輦院差撥。所有威儀僧道等并執持儀物人。並乞就用發引日威儀等人充。詔依。二十八日。禮部太常寺言。將來安恭皇后掩攢畢。立虞行九虞祭。今排定日。分閏七月初八日。掩攢畢。就攢宮獻殿行第一虞祭。九日。早就攢宮行第二虞祭。畢。迎奉虞主回几筵殿。權安奉。十日。行第三虞祭。十一日。神主祔廟受誓戒。十二日。行第四虞祭。十三日。行第五虞祭。十四日。行第六虞祭。十五日。行第七虞祭。十六日。行第八虞祭。十七日。行第九虞祭。十八日。行卒哭祭。二十一日。皇帝行寧神禮。畢。次迎奉虞主赴太廟。次有司行祔廟禮。詔依。閏七月三日。禮部太常寺言。將來安恭皇后虞主還殿。皇帝行安神燒香禮。及祔廟日。行寧神燒香禮。依儀太常卿太常博士前導。奏請不載百官陪位。今相度既無百官陪位。其前導官亦不合用。今欲乞俟將來虞主赴几筵殿安奉訖。皇帝行安神燒香之禮。及祔廟日。皇帝行寧神燒香之禮。並如宮中之儀。詔依。

五日。御史臺閣門太常寺言。已降指揮。虞主回赴几筵殿。文武百僚於錢湖門外奉迎虞主。今來相視到。自錢湖門外一帶街道窄狹難以立班。所有淨慈寺前地步寬展。今欲乞是日。文武百僚於淨慈寺前立班奉迎。及就貼設本寺充宰執以下百僚待班幕次。如值雨。霑濕三門上立班。仍免拜。詔依。虞祭儀。有司排設牲牢禮饌訖。行事官各服常服黑帶。贊者引奉禮郎太祝太官令。詣殿下北向立。禮直官引太常卿詣殿下西向立。禮直官贊躬拜。太常卿拜。在位官皆再拜訖。次引奉禮郎以下升就位。立。引太常卿詣盥洗位。搯笏盥手。悅手執笏。詣爵洗位。搯笏洗爵。拭爵執笏。升殿。詣酒樽所。搯笏跪。跪執爵。俟太官令酌酒訖。執笏興。引太常卿詣虞主前。搯笏跪。上香。再上香。三上香。受幣奠幣執爵。三祭酒奠爵執笏。俛伏興。請少立。俟太祝讀祝文訖。請再拜。引降階復位。禮直官贊躬拜。太常卿拜。在位官皆再拜訖。引詣望座。位南向立。奉禮郎以下。重行俟焚瘞祝幣訖。班退。





